



1	4
1555	
158	

158  
208



門 14  
號 1555  
卷 158

五代史記纂  
誤補

昭和五年  
四月十日  
購求

晉書

五代史記纂

有宋朝請大夫吾家廷珍氏緝所作五代史記纂誤其書久佚今武英殿聚珍版所采集者以晁氏讀書志核之約存原書之十五六則其亾失者爲可惜也今年秋校武英殿本五代史點定之餘不無管見輒錄而次之蓋以昔賢緒論并近時人訂正所及因名之爲五代史記纂誤補其薛氏舊史及新舊唐諸書有及五代時事而語或岐出者別爲考異之書不在此數夫末學膚見敢謂有裨前哲然徵類以稽則疑所叢也緣隙以求則徑所通也飛蟲弋獲庶于慮之一得乎殿本向

有考證係

今上初詞臣所輯附載各卷業已布諸學官無藉贅錄  
卽事蹟離合其已具薛史考證及通鑑考異者槩不復  
著若夫十國四夷歐史本多不備且有遼史宋史及吾  
家志伊氏任臣之十國春秋在茲亦閒爲標舉不欲繩  
所本無也又朝請所著新唐書糾繆有字書非是一例  
勘核精審然點畫小疵或屬刊本偶譌茲旣經校正亦  
略不著第薛氏書名五代史歐陽氏書則名五代史記  
今行本止作五代史而纂誤標名亦無記字均係傳刻

之譌云乾隆四十三年冬十月歸安吳蘭庭識



謹按此本薛氏舊史若新舊唐書及通鑑則皆無其  
文攷舊書昭宗紀龍紀元年四月朱全忠以沛郡王  
進封東平王卽薛史于光啟二年已書改封吳興矣  
而文德元年五月乃云改帝鄉里爲沛王里則何也  
至是張濬私與汴交

謹按此首見張濬而不著其官非也據汪文盛本張  
濬上有宰相二字

河東叛將馮霸殺潞州守將李克恭來降

謹按唐家人傳作潞州牙將安居受殺克恭與此異

十一月曹州將郭紹賓殺其刺史郭饒來降

謹按新唐書朱瑄傳云瑄復取曹以郭詞爲刺史通  
鑑係之光啟三年十月此脫去瑄復取曹一節則前  
此全忠已取曹州此復言來降語失據矣

冬友裕取濮州

謹按紀前於光啟三年十月言取濮州以後不言復  
失惟通鑑於光啟三年十一月書朱全忠遣朱珍還  
濮州而友裕傳于景福元年云是時朱宣在濮州張  
歸霸傳亦云友裕攻鄆屯濮州則朱宣于斗門再勝

之時當復取濮州而史略之也

十一月保義軍亂殺其節度使王琪推其牙將李璠為  
留後其將朱儵殺璠來降

謹按朱友謙傳云璠立友謙復以兵攻之璠得逃去  
與此異蓋此紀傳俱本薛史而薛史記傳自各異也  
四月甲辰天子至自西都

謹按新舊唐書昭宗紀俱作閏四月甲辰此脫閏字  
以宣武宣義天平護國天雄武順佑國河陽義武昭義  
武寧保義忠義武昭武定秦寧平盧匡國鎮國荆南忠

武二十一軍為魏國

謹按舊唐書哀帝紀武昭作戎昭通鑑同注云戎昭  
領金均房此仍薛史之誤

弒濟陰王

謹按此事舊唐書哀帝紀作二月二十二日新紀亦  
係二月通鑑作二月癸卯癸卯正二月二十二日也  
此則上係正月與新紀如出二手恐誤

戊寅封鴻臚卿李崧介國公為二王後

謹按薛史崧作崧又五代會要梁開平二年三月以

唐宗子李崧封萊國公爲二王後其年十二月禮儀使奏唐朝以魏元氏子孫封韓國公爲三恪周宇文氏子孫封介國公隋楊氏子孫封鄴國公爲二王後今國家封唐李氏宗子李崧爲萊國公請以介國公爲三恪鄴國公萊國公爲二王後月明有以介國公爲三恪鄴國公萊國公爲二王後之文知此崧字介字竝誤

癸巳卜郊

謹按監本卜上有改字

翰林學士承旨禮部侍郎張策爲刑部侍郎同中書門下平章事

謹按唐六臣傳策以工部侍郎奉旨拜刑部侍郎不言自禮部爲刑部也攷容齋四筆云舊制執政轉官六侍郎則升兩曹以工禮刑戶兵吏爲敘宰相爲侍郎者升三曹爲尙書者雙轉如工侍轉戶侍禮侍轉兵侍竊意宋制故有所本而微不同此張策當以工侍轉刑侍爲升兩曹也又梁改承旨爲奉旨故策與杜曉傳俱作奉旨而紀俱仍作承旨亦是紀誤



三年春正月甲戌如西都

謹按世多以梁爲都汴州其實不然考通鑑於開平二年云是歲帝將遷都洛陽語蓋本薛史薛史云三年正月己巳遷太廟神主赴西京甲戌發東都已卯入西都是梁此時實自東都遷於西都而此僅以如西都爲文非也然不特此也薛史開平元年十月帝以用軍未暇西幸文武百官久居東京漸及疑訝令宰臣張文蔚已下竝先於西京祗候云云又乾化元年二月壬戌詔曰東京舊邦久不巡幸宜以今月九

日幸東都云云似是梁因乎唐本以洛陽爲都特以襲位伊始未遽議遷且制置東方利於便近故於受命之邦竝建東都而郊禋大禮仍就西都行事厥後均王定亂袁象先遣趙巖齋傳國寶至東都請王卽位於洛陽而王報之曰大梁國家創業之地何必洛陽語見通鑑可知洛陽自爲上都而東都則止是唐東都之比故晉張昭遠所奏亦僅云汴州在朱氏稱制之年有京都之號見薛史晉高祖紀則知此下乾化二年所書四月己巳至自魏州戊寅如西都其內開封而外洛

陽者語亦不合也

夏四月丙午知俊克延鄜坊三州

謹按紀前於天復二年云鄜坊李周彝降以後不言鄜坊復附於岐攷新唐書昭宣帝紀於天祐三年書九月乙亥匡國軍節度使劉知俊陷坊州十月辛巳楊崇本會鳳翔涇原鄜延秦隴兵以討朱全忠蓋鄜坊之地岐汴得失不常而史亦不備著也

秋七月甲申襄州軍亂殺其畱後王班

謹按劉玘傳作山南節度使王班

辛未護國軍節度使楊師厚爲西路行營招討使以伐

岐

謹按師厚傳無徙鎮河中事此時鎮河中者爲朱友謙師厚無由爲護國節度也通鑑作鎮國節度使此護國當是鎮國之誤

癸巳天雄軍節度使楊師厚爲北面行營招討使

謹按本傳師厚爲山南東道節度使以克劉知俊功遷保義又徙宣義巳而從太祖擊趙明年畱屯魏州明年師厚逐節度使羅周翰友珪因以師厚爲天雄

節度使羅紹威傳亦云子周翰乾化二年爲楊師厚所逐攷通鑑乾化元年正月以楊師厚爲北面招討使將兵屯河陽二月師厚引兵救邢魏畱屯魏州三年七月招討使宣義節度使楊師厚於魏州引兵入牙城據位視事則當師厚初爲招討時羅周翰尙在天雄師厚并未卽屯魏州也此云天雄軍節度使者誤

### 末帝

武寧軍節度使蔣殷反天平軍節度使牛存節討之

謹按此事薛史統係九月通鑑先書殷叛繼書九月命將討之此不具時月直屬之四月丁丑之後誤矣三月鎮南軍節度使劉鄩及晉人戰於故元城敗績謹按唐紀晉王敗劉鄩上繫正月通鑑則在二月此

### 據薛史

秋七月晉人取相州張筠奔於京師安國軍節度使閻寶叛附於晉

謹按唐紀晉人取相州刑州在八月又職方攷邢州梁爲仁善軍莊宗改曰安國此安國軍當作保義軍

橫海軍節度使載

六十四

謹按唐書方鑑表大和五年齊德滄節度賜號義昌軍通鑑乾化二年改義昌為昭化軍此橫海軍當作順化軍

四年正月

謹按此脫春字

是歲秦寧軍節度使張守進叛附於晉亳州團練使劉鄩為兗州安撫制置以討之注云舊史不書其月日故書於歲末

謹按監本制置下有使字此脫誤又按薛史張守進

歸晉本紀繫於五年三月五代春秋同張萬進傳作四年

七月劉鄩傳仍作五年通鑑攷異嘗竝舉紀傳之互文以明薛史之難據因定從莊宗實錄作四年八月

此書於四年之末亦有不致徵實之意然則非舊史不書而亾其月日也

河中節度使朱友謙襲同州殺其節度使程全暉叛附於晉

謹按朱友謙傳作逐程全暉語本薛史與此異

唐本紀

莊宗

唐以太僕卿盧簡方為振武節度使會幽并兵討之簡方行至鳳州軍潰

謹按舊唐書懿宗紀咸通十四年三月以盧簡方為振武節度使至嵐州而卒此鳳字當作嵐字又軍潰上亦當有卒字此脫誤

六州三部落使

謹按六州即六胡州謂魯麗含塞依契也舊唐書李

吉甫傳云元和九年於經略軍故城置宥州六胡州通鑑德宗貞元二年河曲六胡州注云六州時已為宥州蓋諸部酋長各以舊州名帶刺史故於時猶有六胡州之名三部落謂沙陀薩葛安慶三部此注云六州三部落皆不見其名處失攷也

明年孟方立死其弟遷立

謹按新舊唐書昭宗紀方立之死俱在龍紀元年上距詔召克用討朱玫中間已隔二年此明年二字誤是時晉軍渭北遇雨六十日

謹按通鑑克用平邠州在十一月丁卯其旋軍渭北  
上係辛巳洎十二月辛亥引兵東歸計辛巳至辛亥  
亦止三十一日此云六十日蓋仍薛史蓋寓傳之誤  
三年正月昭宗復以張濬為相

謹按新唐書張濬傳云韋昭度死復用孔緯為相故  
濬亦拜兵部尚書將復用舊唐書同通鑑亦作上欲  
復相之此復字上當脫欲字或將字

秋李嗣昭復取澤潞

謹按薛史光化元年十二月武皇遣李嗣昭下澤州

二年三月汴人復陷澤州新唐書昭宗紀同此既節  
去此二條則此處復字於澤州未協

西突厥有鐵勒延陀阿史那之類為最大

謹按監本延上有薛字此誤脫

六月及王彥章戰於新壘敗之

謹按王彥章傳云晉人築壘博州東岸彥章引兵攻  
之不克還楊劉戰敗郭崇韜傳略同疑此所云戰新  
壘者非也

甲子魏王繼岌殺郭崇韜及其三子於蜀

謹按郭崇韜傳崇韜有子五人其二從死於蜀攷薛史作廷訓廷誨隨父死於蜀此三字當作二字

鄴都軍將趙在禮反於貝州陷鄴都武寧軍節度使李紹榮討之

謹按薛史同光二年六月以前保義軍留後李紹真

即霍彥威為徐州節度使以徐州節度使李紹榮即元為

宋州節度使攷本史霍彥威傳莊宗滅梁彥威自陝來朝明年徙鎮武寧明是紹榮徙歸德而彥威代之也今行欽傳既略之而此又仍作武寧節度使誤矣

甲辰成德軍節度使李嗣源討趙在禮

謹按通鑑於是日係甲寅蓋是年正月戊午朔見薛史

二月戊子朔通鑑作己丑朔誤蓋己丑若是朔日則

朔日矣薛史於己丑惟冠以二月不言是朔而下於

癸丑之日明言二十六日是以戊子為二月朔日乃

與通鑑之三月係三月丁巳朔見通鑑薛史甲寅則

丁巳朔正合也二月二十七日也此作甲辰乃仍薛史之誤夫薛史

於上已書甲辰矣其時元行欽尚在澶州討賊之事

未遽以命嗣源也乃自此再書甲辰以下逐日踵誤

子乙丑壬申甲戌明宗紀之三月壬子甲寅丁巳壬申其紀事與通鑑常差十日俱誤也然薛史莊宗紀於四月作丁丑朔而明宗紀作四月丁亥朔此卻從明宗紀不誤

龍驤指揮使姚彥溫以前鋒軍叛降於李嗣源入於汴州

謹按嗣源下當仍有嗣源二字文義始明

明宗

嗣源行過鉅鹿掠小坊馬二千匹以益軍

謹按鉅鹿在邢州東北正直魏州之北嗣源自魏南行不得道出鉅鹿也據康福傳明宗自魏過相州福以小坊馬二千匹歸命則鉅鹿當是相州之誤又別本於紀之二千有作三千者與康傳不合當從二爲是

雲南山後雨林百蠻都鬼主右武衛大將軍李卑晚

謹按雨林四夷附錄作兩林攷薛史亦作兩林此誤秋七月甲子隨州刺史西方鄴取夔忠萬州

謹按鄴傳作夔州刺史薛史紀傳竝同此隨字誤



三年春正月丁巳契丹陷平州

謹按此本薛史明宗紀及契丹傳通鑑此條下注云  
元年冬盧文進來奔唐得平州至是復爲契丹所陷  
四夷附錄亦云契丹當莊宗明宗時攻陷營平二州  
攷薛史劉守光傳守光僭號之日契丹陷平州其年  
爲晉之天祐八年又遼史太祖紀天贊二年正月克  
平州二月以平州盧龍軍置節度使遼之天贊二年  
乃唐莊宗同光元年卽四夷附錄固已云自唐末幽  
薊割據戍兵廢散契丹因得出陷平營而于下方紀

莊宗之末趙德鈞鎮幽州云云知契丹之陷平州實  
在明宗之前再考張希崇傳云明宗時盧文進自平  
州亾歸契丹以希崇代爲平州節度使通鑑所記亦  
同是文進歸唐未嘗挈平州以來此正如張希崇代  
鎮平州後亦率其麾下南歸而平州之屬契丹者如  
故也則明宗時不當復有契丹陷平州之事疑不能  
明

壬寅殺捧聖都軍使李行德大將張儉

謹案安重誨傳作十將張儉此大字誤

甲寅董璋陷遂州武信軍節度使夏魯奇死之

謹按夏魯奇傳作董璋攻遂州城中食盡魯奇自刎死與此同而董璋傳則云孟知祥攻陷遂州後蜀世家亦云李仁罕克遂州夏魯奇死之語各異又薛史考證曰考通鑑正月庚午李仁罕陷遂州夏魯奇自殺薛史云四月甲寅以遂州節度使夏魯奇歿於王事廢朝則遂州之陷自在正月而歐史誤以奏聞之日為城陷之日也愚案歐紀誠誤然蜀世家于李仁罕克遂州係之二年正月卻又不誤

壬申幸士和亭

謹按各本俱作士和亭通鑑注引此亦同而纂誤所錄此紀及從榮傳文士字俱作上字疑當以上字為正

愍帝

左僕射權判河南府盧質為橋道頓遞使  
謹按質傳作右僕射薛史紀傳並同此誤

廢帝

明宗入立拜從珂河中節度使封潞王

謹按從珂封王在長興四年已在鎮鳳翔之後此先  
書封潞王而下以是時起事且方紀長興三年非也  
西京副畱守劉遂雍叛於唐來降

謹按潞王雖自爲一家然其號猶是唐也此專以唐  
字屬愍帝言之非矣下竝同

慈州刺史宋令詢死之

謹按薛史慈州作磁州此誤

三月辛丑忠武軍節度使趙延壽爲樞密使

謹按薛史作以前汴州節度使趙延壽爲許州節度

使兼樞密使而此乃云云則似延壽自許州入爲樞  
密使矣語未諦

夏五月辛卯宣徽南院使劉延皓爲樞密使

謹按是年正月丙申朔二月丙寅朔則五月不得有  
辛卯薛史作四月辛卯者得之

夏五月乙卯建雄軍節度使張敬達爲太原四面都招  
討使義武軍節度使楊光遠爲副

謹按此本薛史攷此下有戊申己酉壬子等日則五  
月中不應先有乙卯通鑑以此係之六月甲戌范延

光爲天雄四面招討使之下者得之  
晉本紀

高祖

以幽涿薊檀順瀛漠蔚朔雲應新媯儒武寰州入於契  
丹

謹按漢當作莫後並同

丙子安州屯防指揮使王暉殺其節度使周環右衛上  
將軍李金全討之

謹按李金全傳周環作周瓌此誤

十一月辛亥升廣晉府爲鄴都

謹按薛史唐天成四年六月詔鄴都仍舊爲魏府今  
職方攷旣略之明宗紀亦不著其語則莊宗紀同光  
三年已云改東京爲鄴都而此復云升爲鄴都語失  
據矣

出帝

如京師使李仁廓使于契丹

謹按如京使官名也此衍師字若云此帝自鄴都如  
京師無論無此書法卽下八年正月明有如東京之

文誤又顯然

二年春正月契丹陷秦州三月庚戌馬全節克秦州  
謹按馬全節傳秦州作泰州遼史太宗紀同攷五代  
會要唐天成三年升奉化軍爲秦州以清苑縣爲理  
所晉開運二年九月移治滿城周廣順二年廢州其  
滿城縣割隸易州此秦字竝當是泰字之誤杜重威  
李守貞張彥澤傳同  
丙寅契丹寇邊己丑李守貞爲行營都部署義成軍節  
度使皇甫遇爲副

謹按契丹以丙寅寇邊而此以己丑命將相去凡二  
十四日疑太遲攷通鑑作己丑定州言契丹勒兵壓  
境詔以李守貞爲北面行營云云者似爲得之  
十一月永靜軍節度使梁漢璋及契丹戰於瀛州敗績  
謹按九域志永靜軍唐景州周爲定遠軍宋改永靜  
攷薛史於此作貝州節度使梁漢璋通鑑正作永清  
節度使此靜字當是清字之誤

漢本紀

高祖

與晉高祖俱事明宗

謹按明宗上當有唐字

六月丙辰次河陽

謹按薛史作丙辰車駕至洛此河陽當是洛陽之誤

隱帝

二年注云帝名承祐年名乾祐舉國臣民共稱而不改  
避當時莫大之失

謹按何焯曰承天之祐禮運語也語本土冠禮帝名當是

祐字五代雖不知禮何至并此昧之祐字傳寫誤耳

周本紀

太祖

思綰景崇相次降

謹按王景崇使其將偽降而自焚以死固未嘗降也

此語未合

加貞固司空逢吉司徒

謹按漢紀天福十二年貞固已守司空蘇逢吉傳乾

祐二年加拜司空不言又加司徒薛史於此作加貞

固司徒逢吉司空者得之

請立泰寧軍節度使贊為嗣

謹按泰寧係兗州軍號若徐州則武寧軍也此誤

冬十月丙午漢人來討攻自晉州注云自晉州者見漢兵當誅罪人於京師自晉州而入耳攻城無得失不書此書者許漢來討

謹按薛史廣順元年二月晉州王晏奏河東步騎萬餘人來攻州城以今日五日五道齊攻然則漢之攻晉州已前此矣前不書而此書者前祇州將拒戰而此則朝廷特遣大將也注語似密實疎

世宗

本姓柴氏邢州龍岡人也柴氏女適太祖是為聖穆皇后

謹按周家人傳太祖后柴氏邢州堯山人與太祖同里薛史則云后龍岡人龍川別志又云周柴后魏成安人宋史張永德傳柴后父亦稱魏人柴翁語各異榮為左監門衛將軍

謹按汪本將軍上有大字

三月辛亥李景來買宴

謹按上云三月壬午朔則辛亥乃三月三十日也是年閏在七月而四月有癸丑見薛史庚申等日則此三月二字衍也

丁酉括民租

謹按薛史云遣左散騎常侍艾穎等均定河南六十七州稅賦通鑑亦云艾穎等三十四人分行諸州均定田租而此乃以括民租為文似失之矣

嘗夜讀書見唐元稹均田圖慨然歎曰此致治之本也王者之政自此始乃詔頒其圖法

謹按困學紀聞曰攷之會要世宗見元稹在同州時所上均田表因製素為圖賜諸道崔頌傳云世宗讀元稹均田疏命頌寫為圖賜近臣遣使均諸道租賦史謂元稹圖誤也

五代史記纂誤補卷第一



Blank columns for text on the right page.

五代史記纂誤補卷第一

歸安 吳 蘭庭

梁家人傳

然原其本

謹按汪本句下有末字

梁太祖母曰文惠皇后王氏單州單父人也

謹按職方攷單州唐末以宋州之碭山置輝州已而徙治單父後唐改輝州為單州此單父若據唐言當稱宋州據梁言當稱輝州不得據後唐稱單州也下

張皇后傳之單州碭山縣同  
然行義未必如先人也

謹按汪本如上得有字

太祖少以婦聘之

謹按北夢瑣言云張氏父曾為宋州刺史溫在同州  
得張於兵閒因以婦禮納之攷后既富家子又為溫  
同縣人則素知溫者也溫少時方傭食作賊未必能  
聘婦者且作賊後尙不知存歿則后又當以何時歸  
溫乎似瑣言之云為可信也

柳王友裕攻徐州

謹按友裕之王係梁祖卽位後追封者史家從後稱  
之也張歸霸楊崇本傳竝同

天福元年后以疾卒

謹按通鑑注云張后殂於唐昭宗天祐元年然攷通  
鑑天復元年二月云全忠聞張夫人疾亟遽自河中  
東歸似后當以其時卒也今汪本正作天復若天福  
為石晉年號其誤不辨可知

貞明五年妃病甚帝遽冊為德妃

謹按五代會要少帝妃張氏乾化五年九月二十四日冊爲德妃通鑑作貞明元年九月壬午乾化五年卽貞明元年也此云貞明五年誤矣

莊宗入宮

謹按汪本莊宗上有唐字宮作汴

末帝時爲忠武軍節度使徙鎮武寧

謹按河南許州龍興寺佛頂尊勝陀羅尼石幢有梁貞明三年十一月丁丑滎陽鄭義記記言義爲武寧軍親王元從家寄瑕也主當許下云云武寧親王卽

謂友璋知友璋實自許遷徐也許州軍號唐及後唐

稱忠武而梁則稱匡國此云忠武者誤

妖人毋乙董乙等攻劫州縣末帝發兵擊滅之貞明四年友能以陳州兵反

謹按本紀陳州妖賊作亂在貞明六年友能反在龍

德元年與此異

太祖兼鎮護國軍以友裕爲階後遷忠武軍節度使

謹按本紀天復元年五月以王兼護國節度使通鑑天復元年十一月以韓建爲忠武節度使以前商州

刺史李存權知華州徙忠武節度使趙珣為匡國節  
度使是梁祖之兼護國下距韓建之徙忠武僅數月  
耳攷趙彗傳彗為忠武節度使弟昶珣代立兄弟居  
陳二十餘年梁太祖已降韓建徙珣為同州雷後則  
是珣去而韓建代之其間不應有友裕又鎮忠武也  
薛史宗室傳云太祖兼鎮河中以及友裕為曹後尋遷  
華州節度使通鑑於天復三年二月云以朱友裕為  
鎮國節度使天祐元年十月云鎮國節度使朱友裕  
薨於梨園蓋李存先權知華州而友裕繼實鎮其地

傳中無此一節則此忠武當是鎮國之誤

拜韓勅忠武軍節度使

謹按韓建傳云建鎮許州太祖崩許州軍亂見殺牛

存節傳云遷匡國軍當作忠武軍說見牛存節傳下節度使末帝立

徙鎮天平攷職方攷許州唐故曰忠武梁改匡國同

州唐故曰匡國梁改忠武梁更同許軍號在門平二

為潞州行營招討在三月壬午則書匡國軍節度使而六月壬寅為西路行營招討即書忠武軍節度使其書法固甚密也通鑑於此正作領匡國節度蓋此時牛存

節方在同州而許州無帥則韓勅自是領許州也此

忠武軍當作匡國軍

以末帝為汴州留後

謹按梁以汴州為東都故末帝紀云以王為東京留  
守開封尹此云汴州留後非也

唐家人傳

誰能從公

謹按汪本能作冑

後嫁突厥李贊華

謹按李贊華本名突欲非突厥也此誤

太祖四弟曰克讓克脩克恭克寧皆不知其父母名號  
謹按薛史云克脩武皇從父弟父德成則其父未嘗  
無名號也又云克恭武皇之諸弟攷唐書宰相世系  
表國昌子克恭克儉克用克柔四人則克恭乃太祖  
之兄且同父也克柔亦見義兒傳薛史李嗣昭傳亦  
云武皇母弟克柔唐書沙陀傳武皇又有弟克勤此  
俱不著何也

明年太祖復歸唐克讓還宿衛京師黃巢犯長安克讓  
守潼關

謹按此節語俱本薛史薛史明年武皇昭雪云云通鑑攷異謂國昌以乾符五年拒命六年克用未嘗昭雪克讓何從得入宿衛廣明元年國昌父子逃入鞞鞞其冬黃巢陷長安克讓何嘗守潼關攷薛史武皇紀於克用之殺段文楚係之乾符三年歐史唐紀從莊宗功臣列傳及舊唐書懿宗紀係咸通十三年則唐紀固云明年僖宗卽位招輯克用拜大同軍防禦使亦得以昭雪言之第唐紀於招輯之後復備著沙陀侵叛朝廷命將討擊之事其時克讓何緣得畱宿

衛也此傳語明與紀不符

入說孟氏數以迫克寧

謹按汪本孟氏下仍有孟氏二字

太祖子八人

謹按本紀云克用戰洹水亡其子落落薛史武皇紀云落落武皇

長子也而莊宗紀又云莊宗武皇帝之長子也語亦欠分晰梁紀葛從周張歸霸

李存信傳竝同盧文進傳莊宗有弟存矩薛史唐紀存矩帝之

諸弟也薛史梁紀有克用男廷鸞此皆不載又通鑑攷

異引實錄謂克用遺子存貞詣行在當卽是存勗之

誤而鑑於中和四年書克用將李存貞敗黃揆於沙苑乾寧二年書克用遣其將李存貞爲前鋒及敗邠寧軍於梨園則河東固自有李存貞其人者據薛史則敗邠寧軍於梨園者自爲李存信又不可解也

同光三年十二月辛亥詔封存美等七人爲王

謹按五代會要存美等竝同光三年閏十二月封通鑑亦作閏月辛亥蓋閏十二月二十三日也此脫閏字

存霸歷昭義天平河中三軍節度使

謹按職方攷潞州唐故曰昭義梁曰匡義唐改安義此昭義當作安義餘倣此

存美素病風居太原與存禮皆不知其所終

謹按閩書云唐莊宗弟薛王存禮值郭從謙之亂匿名避難樂延平山水畱居焉

十月己酉繼岌至絳州衍上箋請降

謹按本紀作十一月己酉此十下脫一字

先鋒康延孝叛據漢州

謹按纂誤於後蜀世家先鋒康延孝條下云延孝乃

後殿非先鋒其誤已在唐家人傳解訖今檢纂誤於此無其文蓋采綴時所闕者也

乃拜從益爲彰信軍節度使

謹按職方攷曹州晉開運二年置威信軍漢廢周廣順二年置彰信軍通鑑於此正作威信節度使此誤明宗四子曰從璟從榮從厚從益

謹按明宗有子從謹見薛史本紀天成三年此不著三年徙鎮河東長興元年拜河南尹兼判六軍諸衛事謹按愍帝紀云三年出爲宣武軍節度使明年徙鎮

河東薛史云天成四年四月壬子以皇子從榮爲河  
南尹從厚爲北京留守明是從榮去河東而愍帝代  
之也此云長興元年誤

見者震懾

謹按汪本震上有皆字

宏實騎兵五百自左掖門出方渡河

謹按大業雜記云東都城南臨洛水出端門百步有  
黃道渠過渠二百步至洛水有天津浮橋過洛二百  
步又疏洛水爲重津渠宋會要亦云唐洛陽圖端門



前舊有四橋曰穀水曰黃道在天津橋之北曰重津  
在南並為疏導洛水據此上云從榮行至天津橋因  
陳兵橋北而端門已閉則朱宏實自左掖門出所渡  
乃洛水也史他處

本名從士谷

渡河者更誤

有姪四

從溫從敏

謹按薛史明宗紀有李從臻為明宗諸子此不載

出鎮保義徙河中長興四年夏封洋王晉高祖立徙鎮  
威勝

鳳翔節度使徙北京留守以李從

代蓋帝旋以鳳翔反而從璋亦未赴鎮也攷薛

正三 上月以安彥威為河中節度使二

璋權知鳳翔軍府事本史廢

帝紀亦見河中安彥

知從璋固早去河中而晉初

之授威勝不可以言從鎮矣此傳不具且未核也

明宗愍帝為一家

謹按薛史愍帝有子重哲授銀青光祿大夫檢校工

部尚書見明宗紀此闕不著

晉家人傳

后初號永寧公主清泰二年封魏國長公主

謹按薛史唐明宗紀長興四年九月永寧公主石氏進封魏國公主末帝紀清泰二年三月皇妹魏國夫人石氏封晉國長公主蓋薛史本五代會要會要惟魏國公主作魏國長公主清泰二年三月作四月爲少異耳此則語有脫誤

子曰重貴重信重義重英重允重睿重杲

謹按監本重允作重進若重允則固在六弟之數矣

重允鄭王

謹按五代會要高祖第三子重允剡王剡當是鄭知此鄭字當亦鄭字之誤

三年五月遣宗正卿石光贊云云

謹按上已書三年此爲複出

漢家人傳

注云隱帝舊史實錄皆無皇后帝立三年崩時年二十蓋未嘗立后也

謹按楊邠傳帝欲立耿夫人爲后邠以爲不可薛史

三才圖會卷之三  
作邪以爲太速蓋謂甫除三年喪也會耿夫人亦卒  
不及立后矣注語贅甚又未悉也

周家人傳

瑤官至太子左贊善大夫

謹按汪本左作右

梁臣傳

龐

鼻或請就高爲柵不聽淮人決水浸  
入河上流水至矣

謹按淮人當作淮南人蓋淮特水名若淮南人可稱  
淮人則河南江南之人亦可稱河人江人乎別本下  
淮南并作淮人謬甚史他處如淮人淮兵之類甚多  
不欲枚舉也皇甫暉傳之周師征淮亦同又清口卽今之清河淮  
南人所決之水卽淮水也此從俗作河者亦誤

葛從周

秦宗權掠地潁毫及梁兵戰於焦夷

謹按此事在唐光啓二年攷新唐書地理志  
父天祐二年更名焦夷此從後稱焦夷也

以蔣暉監其軍

謹按薛史作都監蔣元暉此當以諱去三

紀及蔣殷傳俱作蔣元暉宜刊定從一

霍存

太祖曰瑾來必阻

若不若遣兵邀之

謹按監本汲古閣本兵作存

張存敬

太祖表存敬護國軍畱後復徙宗州

甲

謹按存敬才為護國畱後徙宋

一未行或未赴而不當云未至也

寇彥卿

鎮威勝

謹按職

州

且宣化軍唐改威勝

作宣化

康懷英

康懷英

謹按懷英本名懷貞傳不著避諱更名事疎

因取其翟州而還

謹按太平寰宇記鄜城縣李茂貞建為翟州梁改

本已廢州故職方攻小著然徐氏於此不注疎矣

劉人後叛奔於岐以懷英義軍節度使副招

討使

謹懷英陝帥也職方攻陝州梁曰鎮國唐曰保義

保義自在邢州攷王檀傳太元即位遷保義

軍人使力戰全邢州紀於開平三年先書保義軍

節度以王檀為潞州招討使繼書鎮國軍節度使

懷英伐岐可見命將致討各就近鎮此處之保義當

依紀作鎮國固在陝而不在邢也又按紀於三年十

一月書康懷英伐岐當是懷英主兵而非副人以行

者四年八月書楊師厚為西路行營招討使以伐岐

通鑑作師厚為招討使而以會感化節度使康懷貞

為文疑懷英於四年徙感化後乃為副招討耳此從

薛史本傳

劉鄩

鄩大敗南奔自黎陽濟河保滑州末帝以為義成軍節

度使明年河朔皆入於晉

謹按梁唐本紀劉鄩故元城之敗在梁貞明二年而衛磁相洺邢滄貝諸州即相繼入晉故通鑑於是年九月即云於是河北皆入於晉惟黎陽猶為梁守然則此所云明年入晉者豈據黎陽言之乎攷郭崇韜傳諸將曰鄆州隔河難守不若棄鄆與梁而西取衛州黎陽以河為界其語已當龍德三年可知黎陽又終為梁守而貞明中並未入晉也此明年二字誤牛存節

同州劉知俊叛奔鳳翔乃遷存節匡國軍節度使

謹按此以存節鎮同州也下云同州水賊而無并高萬興傳亦云劉知俊叛徙牛存節守同州此匡國軍當作忠武軍

徐懷玉

拜保大軍節度使友珪立朱友謙附於晉以襲鄆州執懷玉殺之

謹按此本薛史本傳據云懷玉以開平三年授鄆坊節度使乾化二年為朱友謙所害然攷本史高萬興

傳劉知俊叛以萬金爲保大軍節度以貞明四年萬金卒乃以萬興爲鄜延節度使劉知俊之叛在開平三年高萬金卽以其時鎮鄜州至貞明四年而死則於中不應又有徐懷玉在鄜州也再攷朱友謙傳本史及薛史俱竝無襲鄜州之事疑有誤也

### 楊師厚

楊師厚潁州斤溝人也

謹按通鑑注九域志萬壽縣有斤溝鎮萬壽唐汝陰之百尺鎮也此仍薛史之文然溝字下當有里字

### 拜山南東道節度使

謹按薛史師厚以徐州節度遷襄州節度也此略不具又舊唐書哀帝紀天祐三年六月甲申敕襄州忠義軍額宜停廢依舊爲山南東道節度使此當天祐二年而云山南東道非也

### 以功遷保義軍節度使

謹按薛史梁紀作開平四年二月楊師厚赴鎮於陝師厚傳亦作四年二月移陝州節度使陝州梁爲鎮國軍本紀開平三年鎮國軍節度使康懷英伐岐而

康傳誤從唐軍號作保義此則懷英敗後師厚繼爲節度招討故與康傳之誤同也

師厚遂逐其帥

謹按師厚以宣義軍節度使兼北面都招討使軍於魏州而羅周翰自爲天雄軍節度使此上云師厚悉領梁之勁兵而於逐羅周翰直云遂逐其帥非也

賀瓌

長衛洛磁諸州皆入於晉

謹按職方攷磁州梁改曰惠州唐復曰磁州此磁字

嘗作惠字張源德朱漢賓傳竝同又按新唐書地理志惠州本磁州天祐三年更名然則磁之更惠尙在唐時職方攷之徑作梁改惠州者亦誤

晉軍取楊劉末帝乃以瓌爲招討使

謹按本紀貞明三年十二月宣義軍節度使賀瓌爲北面行營招討使已巳如西都卜郊晉人取楊劉語與此異攷薛史本紀於三年十二月丁卯云以賀瓌充宣義軍節度使而不言爲招討使於下云是月晉人陷楊劉賀瓌傳瓌授招討使在三年十二月晉取



楊劉在四年春通鑑則云十二月丁卯以賀瓌為北面行營招討使戊辰晉取楊劉語又各異

唐臣傳

郭崇韜

李嗣源為成德軍節度使徙崇韜忠武

謹按薛史莊宗紀帝欲以李嗣源為鎮帥移郭崇韜兼領汴州又冊府元龜載同光中崇韜再表辭鎮批荅曰卿始納常陽請歸上將又稱梁苑不可兼權其再讓汴州所宜依允蓋嗣源先鎮宣武崇韜實領成

德茲欲兩易其處也此忠武當是宣武之誤

安重誨

我固當死但恨不與國家除去潞王

謹按重誨死於長興二年而從珂於四年始封潞王

此重誨口稱潞王蓋仍五代史闕文之誤

周德威

贈德威太師明宗時加贈太尉配享莊宗廟

謹按太尉亞於太師德威以太師而加太尉乃事之必不然者薛史惟言天成中詔配享莊宗廟庭而已

此疑有衍文

符存審

存審三子彥超彥饒彥卿

謹按薛史存審子尙有彥圖彥能彥琳此止云三子何也

西方鄴

西方鄴定州滿城人也

謹按新舊唐書地里志滿城屬易州九域志化外州下亦云易州領滿城此仍薛史之誤

符習

明宗乃以房知溫代習鎮平盧拜公儼登州刺史公儼不時承命知溫擒而殺之

謹按本紀天成元年八月平盧軍節度使霍彥威殺其登州刺史王公儼語同薛史攷薛史明宗紀天成三年十一月青州節度使霍彥威卒以王建立為青州節度使長興元年三月鄆州節度使王晏球移鎮青州三年八月晏球卒鄆州節度使房知溫移鎮青州明是彥威卒於青建立代之建立去後晏球代之

而知溫又承晏球之後也再攷本史房知溫傳天成元年拜泰寧軍節度使明年爲北面招討使屯於盧臺效節軍亂知溫以騎軍盡殺亂者是知溫於天成元二年閒不得在青州而殺王公儼者固霍彥威也此云房知溫乃因盧臺誅亂事相類而誤耳

孔謙

晉與梁相拒河上十餘年大小百餘戰

謹按晉與梁相拒河上在收魏博後而魏博入晉在梁貞明元年距梁亡首尾僅九年通鑑所云戰於河

上殆將十年者是也此二十餘年誤宦者傳莊宗在魏與梁戰河上十餘年周知裕傳梁晉相距河上十餘年其誤竝同纂誤說在唐劉皇后傳

謂崇韜曰鄴北都也宜得重人鎮之非張憲不可崇韜以爲然因以憲畱守北都

謹按本紀同光元年四月以魏州爲東京鎮州爲北都十一月復北都爲鎮州以太原爲北都此以北都稱鄴誤

李仁矩

光業私以書示樞密承旨李虔徽

謹按薛史董璋傳微作徽此誤

毛璋

莊宗滅梁拜璋華州節度使在鎮多不法議者疑其有異志乃徙璋鎮昭義

謹按李承約傳天成中邠州節度使毛璋有異志明宗拜承約涇州節度副使伺璋動靜後遣人代璋璋即時受代薛史毛璋傳梁平授華州節度使明宗即位授邠州節度使動多不法移授昭義

薛史莊宗紀同光三年十

二月壬戌以華州節度使毛璋為邠州節度使與傳不同是其所為不法自在邠

州而此以在鎮不法語即係華州節度之下又不言當明宗時殊非事實

劉延朗

延朗等請帝親征乃行至懷州契丹已立敬瑭為天子以兵而南帝惶惑不知所之遣審虔將千騎至白司馬坡踏戰地審虔曰何地不堪戰雖有其地何人肯立於此不如還也帝遂還

謹按廢帝紀九月戊申如河陽閏十一月丁丑至自

河陽若白司馬坡乃在洛陽之北河陽之南故薛史於踏戰地之日係之己卯明是帝還洛陽後事此於帝不知所之之下便接至白司馬坡而以帝遂還之語終之則似帝此時始自懷州還者疎矣

廢帝以昭允為中書侍郎同中書門下平章事出為河陽節度使與審虔文遇皆不知其所終

謹按薛史韓昭允之入相在清泰二年四月其罷在十一月此於帝紀皆不書漏也昭允之罷薛史云充河中節度使而此云河陽攷薛史清泰二年九月以

宋審虔為河陽節度使三年五月以河陽節度使宋

審虔為河東節度使然則當昭允罷相不容亦在河

陽而固當在河中矣通鑑明云充護國節度使又薛史晉紀天福

四年四月以韓昭允為兵部尚書致仕則昭允亦非

不知所終者也

康義誠

親軍之號始於明宗其後又有殿前都指揮使亦親軍也皆不見其更置之始

謹按石林燕語云殿前軍起於周世宗是時太祖為

殿前司都虞候初詔天下選募壯士送京師命太祖  
擇其武藝精高者為殿前諸班而置都點檢位都指  
揮上太祖實由此受禪見於國史歐公五代史乃云  
不知所始蓋攷之未詳也

藥彥稠

拜澄州刺史

謹按職方攷無澄州攷唐地志俱有澄州太平寰宇  
記澄州於開寶六年併入邕州元豐九域志作開寶  
五年廢澄州知五代時故自有澄州也然則職方攷

之闕略者多矣

盧程

與唐少尹任圜莊宗姊壻也程視圜罵曰爾何蟲豸恃  
婦家力耶圜不對而去

謹按通鑑云光祿卿兼興唐少尹任團圜之弟帝之  
從姊壻也云云攷薛史任圜傳團弟團妻武皇宗女  
而團則新舊傳亦俱無為興唐少尹事此仍薛史盧  
程傳之誤

張憲

憲出奔沂州

謹按通鑑沂作忻此仍薛史之誤

晉臣傳

吳巒

而巒猶守城不下

謹按何焯曰守城疑是城守

漢臣傳

史宏肇

蘇公漢宰相

謹按何焯曰此漢字疑衍

劉銖

高祖即位拜永興軍節度使

謹按薛史乾祐元年三月改晉昌軍為永興軍此及

王景崇趙思綰傳之永興史皆從後書之

周臣傳

王朴

王朴字文伯東平人也

謹按史言唐地每州郡互舉然自乾元以後改郡為

州則此東平當作鄆州他傳如稱譙郡張存敬范陽盧  
進盧導瑯琊臨沂王虔常山真定皇甫常山石邑史之  
屬其失竝同

鄭仁誨

太祖入立以仁誨為大內都點檢恩州團練使樞密副  
使

謹按本紀廣順二年三月內客省使鄭仁誨為樞密  
副使五月仁誨為大內都點檢語稍異

扈載

扈載字仲熙北燕人也

謹按幽燕之地在春秋時稱北燕若唐之北燕州則  
在隋涿郡之懷戎縣武德七年因北齊舊名置貞觀  
八年改名媯州是唐初雖有北燕州而此時則已久  
名媯州矣據東都事略扈載之兄蒙係幽州安次人  
則此當作幽州人也

五代史記纂誤補卷第二

五代史記纂誤補卷二

西知不足齋叢書



